АЖРИМ

(даъво аризасини кўрмасдан қолдириш тўғрисида)

Навоий шахри

2025 йил 6 март

Кармана туманлараро иқтисодий суди, судья А.Хамидовнинг раислигида, судья ёрдамчиси Х.Аллаёровнинг суд мажлиси котиблигида, Ўзбекистон Республикаси Савдо-саноат палатаси Навоий вилоят худудий бошқармасининг даъвогар "Dynamic electronics" МЧЖ манфаатида, жавобгар "Shoxujaxon Xolboy paxtakor" ФХдан асосий қарз ва пеня ундириш тўғрисидаги даъво аризаси бўйича қўзғатилган ишни даъвогар вакили Ш.Усмонов (ишончнома асосида)нинг иштирокида, суд биносида очиқ суд мажлисида кўриб чиқиб, қуйидагиларни

аниқлади:

Ўзбекистон Республикаси Савдо-саноат палатаси Навоий вилоят худудий бошқармаси даъвогар "Dynamic electronics" масъулияти чекланган жамияти (бундан буён матнда даъвогар деб юритилади)нинг хуқуқлари ҳамда қонун билан қўриқланадиган манфаатларини ҳимоя қилиш мақсадида судга даъво аризаси билан мурожаат қилиб, унда жавобгар "Shoxujaxon Xolboy paxtakor" фермер хўжалиги (бундан буён матнда жавобгар деб юритилади) ўз шартномавий мажбуриятини бажармаганлигини кўрсатиб, жавобгардан даъвогар фойдасига 114.517.584 сўм асосий қарз ва 57.258.792 сўм пеня ундиришни сўраган.

Иш муҳокамасининг вақти ва жойи тўғрисида тегишли тарзда хабардор қилинган жавобгар ва Савдо-саноат палатаси вакиллари суд мажлисида иштирок этишмади. Бундай ҳолатда суд, Ўзбекистон Республикаси Иқтисодий процессуал кодекси (бундан буён матнда ИПК деб юритилади)нинг 128, 170-моддасига асосан ишни уларнинг иштирокисиз, ишдаги мавжуд ҳужжатлар асосида кўриб ҳал ҳилишни лозим топади.

Суд мажлисида иштирок этган даъвогар вакили даъво талабларини кўллаб қувватлаб, ундаги важларни такрорлаб, даъво аризасини қаноатлантиришни сўради.

Суд, ишдаги мавжуд хужжатларни ўрганиб чиқиб, ишда иштирок этувчи даъвогар вакилининг тушунтиришларини тинглаб, қуйидагиларга кўра даъво аризасини кўрмасдан қолдиришни лозим деб топади.

Аниқланишича, Кармана туманлараро иқтисодий судининг 2025 йил 24 январрдаги 4-2101-2402/3071-сонли ҳал қилув ҳарори билан "Shoxujaxon Xolboy paxtakor" фермер хўжалиги тўловга ҳобилиятсиз деб топилган ва тугатишга доир иш юритиш бошланган. Тугатиш бошҳарувчиси этиб Ж.Абдуллаев тайинланган.

"Тўловга қобилиятсизлик тўғрисида"ги Қонуннинг 12-моддасига кўра, тўловга қобилиятсизлик тартиб-таомиллари қўлланилаётганда барча кредиторларнинг манфаатларини кредиторлар йиғилиши ёки кредиторлар қўмитаси химоя қилади. Суд қарздорга нисбатан тўловга қобилиятсизлик тўғрисида иш қўзғатиш ҳақидаги аризани иш юритишга қабул қилиб олган кундан эътиборан кредиторлар қарздорга ўз талабларини якка тартибда қаноатлантириш мақсадида мурожаат килишга хакли эмас. Қарздорга нисбатан бажариладиган барча йиғилиши ҳаракатлар кредиторлар номидан кредиторлар ёки кредиторлар қўмитаси томонидан амалга оширилади.

Мазкур ҳолатда суд, даъвонинг жавобгарга нисбатан тақдим этилган талаби қонунга кўра тўловга қобилиятсизлик тўғрисидаги иш доирасида кўрилиши лозим деб ҳисоблайди.

ИПК 107-моддасининг 9-бандига кўра, жавобгарга нисбатан тўловга қобилиятсизлик тўғрисида иш қўзғатилган бўлса ва жавобгарга нисбатан тақдим этилган талаб қонунга кўра тўловга қобилиятсизлик тўғрисидаги иш доирасида кўрилиши лозим бўлса, суд ишни кўрмасдан қолдириши лозимлиги белгиланган.

Шу боис суд, даъво аризасини кўрмасдан қолдиришни лозим деб топади.

ИПК 118-моддасининг биринчи қисмига кўра, суд харажатлари ишда иштирок этувчи шахсларнинг қаноатлантирилган даъво талаблари миқдорига мутаносиб равишда уларнинг зиммасига юклатилади.

Шу боис суд, ишни кўриш билан боғлиқ суд харажатларини даъвогарнинг зиммасига юклашни лозим деб топади.

Юқоридагиларга кўра, Иқтисодий процессуал кодексининг 107-моддасининг 9-банди ва 195-моддаларини қўллаб, суд

ажрим қилди:

Ўзбекистон Савдо-саноат палатаси Навоий вилоят худудий бошқармасининг даъвогар "Dynamic electronics" масъулияти чекланган жамияти манфаатида, жавобгар "Shoxujaxon Xolboy paxtakor" фермер хўжалигидан асосий қарз ва пеня ундириш тўғрисидаги даъво аризаси бўйича қўзғатилган иқтисодий иш кўрмасдан қолдирилсин.

Даъвогар "Dynamic electronics" масъулияти чекланган жамиятидан давлат бюджетига 3.435.528 сўм давлат божи ундирилсин.

Ажримдан норози тараф Навоий вилоят суди Иқтисодий ишлар бўйича судлов ҳайъатига белгиланган тартибда апелляция ёки кассация тартибида шикоят қилиши (протест келтириши) мумкин.

Раислик килувчи.



А.Хамидов